

陶文毅公全集

陶文毅公全集卷四十四目錄

文集 贊 銘

開元寺二石佛贊

東方生畫像贊爲唐陶山先生作

開平王像贊

有序

陸朗夫中丞像贊

王司馬德政圖贊

有序

洞崖先生像贊

陶桓公像贊

有序

魁星贊

劉先生贊

有序

印心石屋主人畫像自贊

平面日晷銘

端硯銘贈劉生鼎盛

海曙樓銘

文集 贊 銘

開元寺二石佛贊

一名維衛一名迦葉
晉建興中浮海至吳

我聞賢劫過去佛七維衛其始

卽毘婆尸
佛之別名

迦葉其

卒常寂光中無去來迹清淨法身非形相質云何
幻化現此拳石凌涉波濤驚走愚哲謂石是佛點
頭何默謂海能浮寶筏可息此種因緣不可測識
峰飛靈鷲塔涌寶級風輪願輪卽空而色苦海願
海是二而一我語尊者乞大慈力河順東流峰銷
西極卽此閻浮成極樂國尊者寂然示我雙膝說
法旣終天花雨室

東方生畫像贊爲唐陶山先生作

抱該博之識而自託於滑稽處親近之地而自遠
於塗泥王母欲笑細君是貽其視王公貴人直等
之如彼雌道足以召泰階六符惜乎不竟其施於
庠此古之東方先生耶吾於衡岳之麓陶山之陰
彷彿乎遇之

開平王像贊

有序

王姓常氏名遇春字伯仁懷遠人年二十三仗劍從明太祖破采石扼陳友諒虜張士誠平山東河南遂下大都走擴廓帖木爾西定秦隴俘元孽於塞外師還柳川病卒初封鄂國公沒贈開平王太祖嘗手疏王戰伐以授宋濂令爲傳稱開國之功王居十之六七云今其十五世孫元韜以王遺像索題秀眉修目面赭赤而微黝鼻堅挺鬚長不及寸兩耳軒張綴金環焉王卒時年四十此作三十許人龍袞繡衣貌婉儻而

有英銳之氣想見凌煙閣中非常人物也爲之

贊曰

鏌鋁之山逆淮西上屹爲荆塗蟠根鉅壯神鋒天
挺乃誕英豪奇呈燕領胸有豹韜仗劍從戎奮戈
赴敵電掣雷轟所向必克杯吞江漢席捲勾吳長
驅河朔遂越飛狐西邊月下角崩夜走掃穴犁庭
獲其遺醜恥雪百王勲誓千古雖不永年剖符錫
土功名之際善處爲難公忠謙遜步武中山昔在
大唐尉遲敬德英姿颯爽是稱鄂國亦越有宋鵬
舉魁魁亦稱鄂國及王而三王之神勇古今罕比

不意留侯乃如女子馮公倚樹祭侯投壺成功不
居視此畫圖

陸朗夫中丞像贊

綰金符紆華裾獨立無人撫卷踟躕似愍大道之
蕪沒思返之於厥初慈烏啞啞白華油油臥不釋
衣色養惟柔功名所從出豈不在乎內行之克修
開衡岳千重雲飲湘江一杯水曾無異人老書生
耳公在長沙福我楚疆我來吳下親公梓桑邈芳
徽之難卽瞻遺像以旁徨

王司馬德政圖贊

有序

同年王觀察希白出示尊甫咸齋先生德政圖
一冊乃先生由平湖宰升海防同知臨去時邑
士張誠所作以識遺愛者圖凡八幅各繫本事
於後曰講堂課士曰賢墓崇封曰橫橋導水曰
乍浦築臺曰寒郊瘞骼曰儉歲賑饑曰城西纂
志曰湖東建亭言皆紀實不爲虛美古循吏設
施於茲可見宜其口碑載道也希白由翰林作
宰淳升今職入都時特蒙

召對不次之遭有以知析薪之澤遠矣系之贊曰

茫茫且蘭唐蒙所通山川磅礴氣象籠嵒靈秀旣
闢瑰瑋爰鍾篤此英賢起家儒素學道愛人澤流
恩煦豈弟君子謳思弗去至今當湖頌聲載路載
路維何下車造士西蜀講堂鴻都經市芄芃械櫜
蒸蒸桃李餽稟是資譽髦鵲起鵲起旣奮景行維
賢龜趺蝕雨馬鬣凝煙壘無犯柳田爲封綿堂堂
清獻印此心源心源所印治行遙接乙巳旱災遺
黎靡子弛禁通商糴乃無閉澤靜鴻敷民忘菜色
菜色雖羸遇春而蘇道殣莫掩終委溝渠文軫枯
骨莊悲髑髏職修蜡氏感激明幽明幽交感政成

一貫乃命山川乃徵文獻事從其信傳戒其濫抗
手賈耽希風班掾寇恂孰借王渙猶思轍雖莫杞
口尙餘碑播諸圖畫遺愛永垂其圖誰作熙河張
子條修件繫敷陳懿美乍浦臺高橫橋波駛樂只
無疆令聞不已令聞不已世德作求公侯復始燕
翼貽謀越人善禱吳亦能謳緇衣繼美奕葉揚麻

洞崖先生像贊

白簪之奧黃蓮之垠峰回溪互有石縱橫其橫伊
何截然如城天門中開巍乎若傾有蟬如蟾蹲於
高冥石洞窅然下臥仙靈山空無人水流有聲白
雲來往浩乎英英噫此佳處誰與爲盟或曰其中
大隱是貞沈默好學其書滿簾發爲文章石色硜
硜與水相忘因風乃成家風克篤且讀且耕步履
旣康面目斯清彼何人斯曰吾伯父洞崖先生

陶桓公像贊

有序

公諱侃字士行鄱陽人徙家尋陽漢高帝功臣
開封侯舍之後也父丹吳揚武將軍母湛氏公
幼稟慈訓起家樅陽令仕至使持節侍中太尉
都督荆江雍梁交廣益寧八州諸軍事封長沙
郡公諡曰桓追贈大司馬公性宏毅孤根特立
有綱維四方之志值晉南渡掃除亂孽再造王
室忠義之氣橫秋霜而貫白日史言公勤於吏
職闔外事千頭萬緒綜理細密筆翰如飛門無
停客嘗語人曰大禹聖者乃惜寸陰至於衆人

當惜分陰又曰老莊浮華非先王之法言無益
實用君子當正其衣冠攝其威儀何有蓬頭養
望自謂宏達耶家傳載公好學善談論尤明詩
易御覽復引別傳言公釐明詩書春秋足徵公
志在聖賢嚴斯道之防且有功經學不徒勲高
百代爲有晉第一純臣也石頭城爲公摧蘇峻
之所遺烈在人茲於其前博山之陽闢書舍肖
公祀之用志景仰因以惜陰之義爲多士有志
於學者勗像成敬爲之贊曰

於鑠桓公緒衍濟陽八州作督七族重光身鎮地

軸手扶天綱投袂而起大義勤王千里肅清遂奠
苞桑長沙開國像繪武昌嫉時清談力闢老莊習
勞戒逸百鍊是將竹頭木屑布置精詳擣搗博具
投之汪洋語其忠順希跡孔明意存法外功在旂
常每懷古哲莊語日彊尺璧非寶百鍊彌剛鬼鬼
石城遺烈在望樹之精舍惜陰是名斯聖賢之徒
歟邈山高而水長

魁星贊

睢其目齡其齒藏其毛黎其趾有神報陰

魁星徵名

諸此豈管鉅於金而擊不靈奚斗大於印而髮猶
指傀形詭貌詫廬陵之朱衣宰祿司文弼梓潼之
亞子燭炮三條花飛萬紙記得簾前見者如是如
是

劉先生贊

有序

先生益陽十里人恢廓磊落鄉里有事多咨之
率片言以解乾餱之愆用是衰息族姓尤睦綏
急有無求之立應嘗建宗祠置地若干所歲時
率族人致祭雍雍有古法次君翼芝與予少同
硯席條舉先生事蹟屬予一言書諸家乘乃拜
手爲之贊曰

謂先生爲名路人歟而弗瓊其聲謂先生爲山中
人歟而弗桐其冠楷於家庭模於閭里其可見者
如此於戲先生非今之人也古之志士

印心石屋主人畫像自贊

而眉龐而髯長仙心儒素而佛腸手此一卷烏奕
書香

平面日晷銘

周官建國辨方正位月令勤民率作興事二十四
方二十四氣晷以測時三者咸備候氣之琯寒燠
或愆指南之鍼癸丁或偏維晷之綫曰日景界節
有贏縮景無弗屆維晷之表用正地中南北既定
辨乎西東所以者何有極高度黃赤經緯於是而
步天以運行人以法測厥道有常所司罔忒通知
民性物則是依豈其嚮化而與令違曷觀於天流
行不息誰其代工而鰥厥職撫茲平晷惜乃分陰
磐石垂模爰告盍簪

端硯銘贈劉生鼎盛

端石一方質粹而光會與予入金閭上玉堂試墨
黼座勿燦然助予之文章劉生得此其寶藏

海曙樓銘

中國山川盡於東而離照卽生於東天地所以成
始而成終故觀天地之大於海觀海於日出觀日
出於臨溟峻極之山所居高則所見大大則反其
本矣九能之士登高能賦山川能說可以爲大夫
而禮仲夏之月君子則以居高明遠眺望豈非觀
聖人之道必去耳目之近而返從其朔者哉雲臺
山踞東海中其脈來自岱宗故與日觀峰對峙又
隔海爲成山島則登萊斗入大海秦漢所祀日主
處爲古寅賓出日之所相望鼎立而皆不若雲臺

四面際海於觀日出尤奇其可無樓樓其可無銘

銘曰

日出博桑聖出東方萬物以昌維百谷王

陶文毅公全集卷四十五目錄

文集

神道碑

墓誌銘

刑部侍郎小峴秦公神道碑

陝西按察使司按察使晉贈通奉大夫布政使銜

樂園嚴公墓誌銘

護理陝西巡撫陝西布政使司布政使陶山唐公

墓誌銘

賞翰林院編修前山東按察使司按察使琢堂石公墓

誌銘

封朝議大夫汪君墓誌銘

陶文毅公全集

卷四十五

目錄

戶科掌印給事中蔣公墓誌銘

山西平陽府知府韓君墓誌銘

山西蒲州府同知陳君墓誌銘

趙琴士徵君墓誌銘

安徽無爲州學正

誥封中憲大夫例晉通議大夫河南按察使司按察使

張君墓誌銘

內閣中書李君墓誌銘

封翰林院庶吉士蔣先生墓誌銘

傅明經墓誌銘

薛上舍墓誌銘

封奉直大夫孫君墓誌銘

趙母李太恭人墓誌銘

彭母黃太宜人墓誌銘

章宜人墓誌銘

長女瑞姿墓誌銘

文集

神道碑

墓誌銘

刑部侍郎小峴秦公神道碑

嘉慶十五年刑部侍郎秦公以目疾乞骸骨歸士大夫送者載道咸望其再出而公遂家居講學以終道光元年某月也享年蓋七十有幾云惟無錫秦氏世稱有人

聖祖開鴻詞科時與睢州湯文正公同舉以進士改編修官左諭德學者稱蒼峴先生是爲公高祖官翰林院侍講以理學事

世宗學者稱南沙先生是爲公從曾祖

高宗朝仕至刑部尙書太子太保謚文恭治五禮明五刑
爲世名臣是爲公從祖公不嗣前德得古文法於
蒼峴得經術於南沙得

朝章

國憲於文恭公漉液融根涵泓龐碩疑疑樹立績學
彌成乾隆二十九年中順天鄉試四十一年

純廟東巡獻賦

行在

授中書公於內閣以中書遷侍讀爲軍機章京於外歷溫
處道杭嘉湖道浙江湖南廣東按察使於九卿爲

光祿寺太常寺卿都察院左副都御史於府尹爲
順天府於六部爲戶部郎中累官兵部刑部工部
倉場左右侍郎又嘗知會試貢舉故事非進士出
身不命公以舉人異數也凡仕中外三十四年以
按察司刑部最久事無滯刃以直與法用意至到
於浙於廣屢平反海盜之以良被誣者於湖南於
浙屢爭收成之不復報災與軍興之不敢請賑者
折疑似之獄於一色一言爭讞成之案或至再至
三每有所救正然亦以是多齟齬不合擢浙藩入

見遂乞內用

卷之五
天子知其才且伉直由京卿遷府尹旋畀以司寇執法如
故遇不可以次紙爲疏言雖多格於時議而去位
後羽部歲更條例猶時見諸施行如公言顧公意
恒自嘆方

仁廟竦意嚮用卽以年乞致仕未幾又以疾請解職

天子雖勉從所請仍

諭候痊愈起用而公竟不復出矣里居十數載布衣蔬食
蕭然如寒士比卒人猶以爲未竟其用云公諱瀛
字淩蒼號小峴晚自號遂菴言遂其初志也好汲
引士類孜孜講藝不少倦治古文法尤嚴遺言以

墓誌屬新城陳司業用光以墓表屬予予重違其
意又嘗辱公寵銘其先人敢辭不文用揭公於錫
山之阡以表公之清德以世秦氏之望

陝西按察使司按察使晉贈通奉大夫布政使銜

樂園嚴公墓誌銘

皇帝卽位之初元首擢漢中知府嚴公爲陝安兵備道
四年正月復以公宣力於陝有年功在南山

特加按察使銜

殊旨獎勵如漢璽書勞問故事旋實授陝西按察使將
大其用而公遽以病卒

天子悼焉因秦人之恫

俞其請俾奉祀名宦歲時享祀勿絕仍加贈一階以布
政使銜入祠酬蓋庸表遺愛也嚴氏出浙之桐廬

宋末始遷湖南澁浦明景泰間有諱秀者當方瑛
討黔苗時以諸生應募率熟苗破賊而不受官沒
祀忠義祠是爲公八世祖數傳至諸生自治有隱
德家益起祖應鼎國學生父君極貢生兩世贈如
公官生母李夫人方孕公嫡母何夫人夢大星墜
懷中光四溢因小字滿星始讀書日十行下年十
三補縣學生師事少鴻臚羅先生典於嶽麓先生
極重之乾隆己酉以優行貢學使者張姚成稱爲
經世才足當大任時海內承平久武備弛公獨留
心兵事會乙卯正月黔苗作亂據乾州犯鎮算辰

沅震動

朝廷命雲貴總督福康安督師進討湖南巡撫姜晟
及兩湖總督畢沅以師會於辰姜公固嘗訪人才
於學使張姚公者也夙知公延問計所出公草平
苗議十二則言勦撫防禦之策甚備其要在急復
乾州由乾進永綏可與保靖松桃鎮箠聲勢相通
而攻乾道瀘溪必先得大小章人乃無阻大小章
人者故土司遺民散處邊界名曰狍狍最勁健與
苗世讎苗之攻浦市也假道狍狍不應怒焚其寨
狍狍率衆出保浦市兵勇漸集不能禦苗則執狍

猱以爲功猱猱忿苗因誘與俱叛官軍頻失利公
乃募能爲猱猱語者得向國果數人赴大小章開
示利害挾其酋六人以出公推誠與同臥起咸感
動歃血誓不反送子弟十九人爲質許率其屬陽
投乾州爲官兵內應約一舉破賊會雲貴主兵者
欲專其功嚴檄楚軍毋輕動計遂不行然明年卒
賴其力以救兩鎮兵於河溪通乾州東路自後復
平隆戰花關掃諸巢率常爲軍鋒而大小章於大
府檄或不奉必得公手書始行云公在姜幕凡四
年嘉慶庚申始以孝廉方正科赴

廷試時川陝湖北教匪方熾

制詔詢平定三省善後事宜公對言軍興數載師老財匱以數萬罷敝之衆與猾賊追逐數千里長林深谷之中投誠之賊無地安置則已降復亂流離之民生活無資則良亦從亂鄉勇戍卒多游手募充慮一旦兵撤餉停則反思延亂如此則亂何由弭臣愚以爲莫若仿古屯田之法三省自遭蹂躪叛亡各產不下億萬畝舉流民降賊之無歸鄉勇戍卒之無業者悉編入屯團練捍衛計可養勝兵數十萬餉省而兵增化盜爲民計無出此疏上

睿皇帝親擢第一以公疏末有迫寸晷限尺幅未得盡摠
愚忱之語

傳旨次日詣軍機處俾罄所言公迺復條上屯政方畧十
二事蒙

召見圓明園以知縣發往陝西並其疏交三省大帥督撫
采行明年二月補洵陽縣縣宅萬山中袤延七八
百里與湖北之鄖西竹山竹谿陝西之白河鎮安
安康平利犬牙相錯官兵追賊急往來折竄皆道
洵公乃力主堅壁清野之議相地險要爲寨堡選
置團勇正副長且耕且守且戰設卡於高岡瞭望

賊至舉礮一耕作者歛農具舉礮二人畜皆歸寨
堡舉礮三則團勇各據隘以守頃刻間警備逮數
百里公念百姓可勝不可敗賊鋒銳勿迎擊俟其
無所掠必去去則出奇鈔其尾視其夕頓處多方
擾之疲其力使不得休息又念賊以劫掠爲生所
至飄忽而官軍行必待糧故追常不及乃擇堅寨
值兵衝者貯糗糧備供給由是聲息連絡賊勢大
蹙其年四月遂督寨勇生擒賊帥陳朝觀五月殲
賊徐添德樊人傑六月復與官軍夾擊張天倫張
三標熊翠兒等七股賊於太平寨凡萬餘人一戰

平之經略額勒登保參贊德楞泰連上其功得

旨加知州銜賞戴花翎嗣復擊斃楚北逸匪二千餘人於
蜀河口計斬賊目王詳擒方孝德伏誅方孝德故
戕白河令黃袞者也羣賊憚公威名相戒勿入境
督撫奏之

命以同知直隸州用癸亥八月補定遠廳是時賊勢益窮
分竄山林而西鄉縣界川境多深箐初設廳以公
守之公以廳爲全陝門戶乃建新城復於廳之西
南各百餘里擇地曰黎壩漁渡壩分築二石城爲
犄角團練武備如治洵陽時賊至輒殲先後擒陳

心元及戕害朱副將之賊馮世周等巡撫方公維
甸奏加知府銜旋丁生母憂僉議援金革例請留
公以情不可奪名節當全婉辭大府重之聽扶柩
歸丁卯服闋入都

諭仍發陝西以同知用交軍機處記名己巳二月題補潼
關廳同知

特旨授漢中府知府公以兵燹後民困兵驕散勇逸匪羣
不逞之徒心面未革教養之法宜先於是舉工賑
修渠堰完倉廩以足民食聯營伍治堡寨團保甲
以固民衛慎訟獄培學校禁邪說以正民俗疏節

開目與民休息南山遂大安以其間開諭悍回縛
獻亡命賊七十一人於華渭散軍功王姓匪徒數
百於寧羌擒圓頓教首陳恒義等於城固皆推誠
心置人腹治渠魁寬脇從人心悅服令行禁止而
十八年廂匪之變至勤大兵勦討說者謂始事時
苟得公治之當可不煩一兵雖旋踵撲滅公亦以
饟饋無缺加道銜然非公意也公在南山旣久亭
障要隘村寨徑路曲折無不口講指畫而心縈繚
之窮鄉遠谷老兵婦孺皆識其姓字關漢臺選髦
儁躬親講授十三年如一日所成就士起家侍從

牧令者數十人率有聲然勞於治民拙於事上始
大吏咸度外待公嘗歲暮卜築寧陝新舊二城歸
而南山晚收大歉已逾請賑之期遂元旦趨撫轅
稽首請棄一官爲百姓請命巡撫董教增卒爲破
例奏獲請言聽計從故得發舒及董公去而公十
年不得調益懇懇飭吏治勤民事名滿三省間道
光元年

特擢備兵陝安以諸臣條奏南巴二山情形下陝西四
川湖北督撫議時川督今大學士蔣公攸銛屢道
陝安境亟稱公之治遂會奏委公總勘公自川入

楚反陝數千里相度形勝析官移治增營改汛條
列井井奏入

報可邊防遂密然公平日言山內州縣距各省會遠鞭
長莫及推諉牽掣宜仿古梁州自爲一道及明設
鄖陽巡撫之例專設大員鎮撫而割三省邊郡州
縣以附益之庶勢專權一百世無患以更張重大
未竟其議也壬午巡撫盧公坤至特重公隨拜加
銜之

命仍留陝安道任公愈感激思効盧公採其議奏增廳
治於盤屋洋縣界增營兵於商州及略陽復委公

興修水利先是公在漢中因平壩田衍艱灌溉履
視山河五門楊鎮大小百餘堰皆加疏治至是欲
廣其法於全秦奉檄視豐涇灃澆渭汭諸川鄭白
龍首諸廢渠疏鑿蓄洩規畫具備而社倉義學諸
法亦以次推行焉乙酉十一月

詔授貴州按察使未行丙戌正月仍留陝西按察使入
覲三承

召見奏對悉稱

旨歸途感微疾抵任七日卒道光六年三月初二日也
距其生乾隆二十四年八月二十四日年六十有

八公起諸生爲縣令擢道府至臬司皆出

特簡中間小有阻

主知弗替

今上用賢多不次與廷臣言置吏才未嘗不首及公特
以南山二十年鎮靜之功非公莫屬故雖遷擢頻
仍猶若不得已遲留之俾歛惠於一方比任久地
方綏輯規畫已無遺

天子慨然思大其福於秦民驟用公而公不及待矣於
虛惜哉其卒也秦民巷哭如失慈父母願比朱邑
桐鄉請其柩入南山弗得則願請祀名宦而湖南

之人亦具公事狀請入鄉賢祠爲桑梓矜式皆得
旨報可公諱如燧字炳文生平慕范希文爲人取先憂
後樂意自號樂園性豪邁去邊幅泊榮利晚更沖
粹視之田夫野老人也及其馳騁古今理亂貫串
天文河渠兵法星卜以逮輿地險要形格勢禁若
聚米畫沙燭照而龜灼所規畫常在數十百年外
遇槃根錯節無不迎刃以解其措施略見於所著
書嘗佐兩廣總督那公彥成籌海寇有洋防備覽
佐姜公籌苗疆有苗防備覽佐辰沅道傅鼎籌屯
田有屯防書又有三省邊防備覽漢中府志及樂

園詩文集若干卷後之有志經世者必將取鏡焉

公配張夫人佐公治漢中手繅車教民婦紡織棉

花之利遂興生子二長芝癸酉科副榜貢生以官

學教習分發河南試用知縣次正坊候選府經歷

側室胡氏生女一適候補中書南海吳尙志又撫

兄女二適沂州營都司世襲雲騎尉麻陽滕國興

孫男女各一以丁亥十月初七日葬本邑會仙亭

右之青竹隴公子以狀來乞銘澍之 先人與公

敦古交知公最詳且將以備

史館之采故繁而不殺焉銘曰

倬彼南山維石巖巖分陝由之化逮漢南是稱陸
海灌翳榛莽所守或非化爲夔魍桓桓嚴公匹馬
南來亦文亦武莅此漢臺自公之來再造鵠首披
荆刈萊盪滌羣醜訟不再炊畝有餘糧以拯秦人
於溝於隍昕聞庠鼓跡屏城闕以革秦人於獮於
狝秦人望公如歲如慈秦人敬公如保如師孝廉
方正其名甚美如公克稱一人而已載茲盡篤

天子所知貽爾樂利百姓是思百姓既思

天子既知循吏何負而人不爲奕奕南山其大千里公
廟巋然與之並峙公廟在山公墳在南我辭可徵

陶文毅公全集

卷四十五 文集

三

百爾式監

護理陝西巡撫陝西布政使司布政使陶山唐公

墓誌銘

道光七年三月念二日致仕陝西布政使陶山唐公卒於金陵寓邸公有德於吳聞者輟春相海州之民尤悼具事狀請祀於名宦祠蘇州亦繪像刻石滄浪亭適長君鑑卜葬有期以澍知公尤深來請銘澍不敢辭謹按狀公諱仲冕字六枳世爲湖南長沙府善化縣人曾祖啟科祖學文國子生父煥乾隆辛酉舉人山東平陰知縣有惠政祀其地曾祖妣劉氏祖妣彭氏母李氏譚氏三代皆以公

貴

誥贈如例譚太夫人生子三公其次也年十二應童試
學使盧學士文弢大奇之舉乾隆甲午鄉試癸丑
成進士以知縣分發江蘇補荆溪初蒞任卽決陳
獄數十老吏驚服調吳江地濱太湖多盜柵至則
審戶籍界垣墉別良楮一革其舊尋調吳縣辦清
漕擢知海州州鄰山東鄰近境梟匪出沒倚羽山
爲巢穴白晝攫人財物名曳刀手計擒其渠餘黨
遁跡先是州試附淮安府道遠罕赴又無書院肄
習士益側陋乃創石室書院甄拔俊異親授讀書

之法言於學使者奏請歲按臨卽石室爲考棚試
竣仍以棲學者由是文教大起爲河北冠州城不
通舟米薪無市爲鑿渠自新浦口達東門濠長千
餘丈時嘉慶九年也因名之曰甲子河州人便之
更呼爲唐公河歲歉請寬肩負私鹽之禁以卹災
黎官爲給籌謂之籌鹽公餘則駕杉船渡海至高
公島鷹游門人跡罕至之區以按奸宄並諭父老
子弟大義焉在州四載民大誠和量移通州攀轅
留者幾萬比至通值淮大漕急買米設粥且請弛
關禁以便流民革喊稟之俗以懲吏胥時大吏皆

賢公連署松江蘇州府癸酉推升福建建寧知府
總督張公百齡奏請以道員留江南檄查海州安
東阜寧諸淤地按畝升科公謂此舉近牟利而實
無利可謀不如其已既知事難中止則請照舊賦
之下則三等分別定則訖事無擾已復檄濬吳淞
江公以江之淤由海潮挾沙宜疏來源除內壅修
閘壩大舉一勞乃可久時以費絀不能盡用其議
至今惜之公年四十始釋褐爲縣令積勞至二千
石勤懇練於事先後督撫如岳公起黎公世序及
張公皆深加倚重顧清羸善病常志退閒諸公輒

勉留之一署河庫道兩署按察使

今上卽位拔用人材多不次公以候補道員

特旨擢福建按察使元年五月抵閩九月擢陝西布政使在陝僅一年三護巡撫印查勘南山收成及議覆錢糧加耗諸疏皆順輿情四方想望風采庶幾大竟其用而公則已老矣三年正月遂致仕公爲政務大體不喜操切而察吏懲奸無稍姑息在閩時有陳某者以海盜投誠積官至副將性婪虐索賄於騎都尉某不遂則誣以事公廉得其實治陳罪閩人大快權蘇臬時富宦僕茅某濫膺五品公

立按之如例人尤服其廉明學本庭訓以通經爲
致用服官三十年未嘗一日廢書布衣幅巾蕭然
儒素海內識與不識皆稱爲陶山先生所著五禮
六聯表儀禮蒙求家塾蒙求陶山文錄詩錄詞錄
代覽若干卷行於世晚歲撰退閒錄經學錄泰階
六符又擬撰衡疏未竟而卒距生乾隆十八年九
月初八日年七十有五配寧夫人先卒子三長鑑
已巳進士翰林院檢討浙江道監察御史廣西平
樂府知府娶寧鄉王氏宗人府主事文清孫女繼
鄆縣楊氏溫州府知府兆鶴女次鏌浙江鹽運司

副使娶本邑甯氏繼江寧楊氏山東長清縣知縣
宣女次錢甘肅涇州直隸州知州娶寧鄉黃氏文
學燦女女二長適邑增廣生黃拭次適江西上清
司巡檢陳玉衡孫男三爾羨聘京畿道御史賀熙
齡女爾鴻聘同邑舉人俞超孫女皆錢出爾淵鑑
出孫女八鑑出者七長適工部侍郎宛平顧德慶
之子蔭生蘭徵三許字翰林侍讀錢塘戚人鏡之
子其一錢出初譚太夫人卒於山東官舍遂葬肥
城之陶山故公以自號並改鑑鎖籍其地遺命附
葬山向以甲庚銘曰

生衡宗藏岱宗考焉宦此焉官生焉侍沒焉從鬱
松柏馬鬣封絜唐氏系陶同宅於茲蔭無窮黃鶴
返白雲滄魂來往故鄉通

恩賞翰林院編修前山東按察使司按察使琢堂石公墓

誌銘

公諱韜玉字執如號琢堂祖籍丹陽系出宋曼卿先生後

國初自丹陽遷吳縣至公已四世曾祖政祖邦植字介菴考熙載字韜山三世俱以公貴贈通議大夫妣皆贈淑人韜山公有三子皆殤妣徐太淑人夢介菴公授以白璧而公生穎敏過人讀書卓犖有特識年十八補吳縣學博士弟子員乾隆己亥

恩科舉於鄉庚戌

恩科成進士

殿試進呈卷第二甲一名

純皇帝特拔置第一甲一名授翰林院修撰王子充福建
正考官旋即視學湖南未散館而

簡放學政前此未有眞異數也任滿還京正值楚苗不靖
復

命時

高廟詢及軍務奏對稱

旨丙辰充日講起居注官戊午入

上書房行走是年冬京察一等授四川知府時蜀中

方用兵公補重慶府兼護川東道經略勒威勒公
知公才川以東軍事悉屬焉嘉慶庚申賊過嘉陵
江將犯重慶公與總兵許文謨防守周密賊不敢
窺嘗率精兵擊賊於土沱獲賊渠甘某誅之又立
團練法習技勇三班分班訓練更番休息有警一
呼畢至渝城遂得晏然勒公重莅蜀調公赴營專
司章奏事時賊方蟻聚川陝楚三省閒賊渠樊人
傑別爲十號分路肆掠

廷議用兵殲一股盡再剿他賊公謂勒公曰今官兵
僅經略參贊及公三路耳而賊至數十股若專剿

一股餘無兵掩捕勢且益熾爲今計莫若分兵有
一股賊卽有一路官兵迎捕使賊無暇劫掠賊不
得食當自潰勒公曰善卽屬草一疏陳之王戊三
月始定分兵策兼用堅壁清野法公作守寨方略
十二則檄行川東北從此賊漸解賊首次第就餒
是冬卽勘定大局至癸亥秋而三省廓清矣守渝
時副將趙某統兵勇各千過渝已給口糧矣而鄉
勇不行公廉知有隊長者最黠桀召而責之嗣是
兵過渝無敢留者勒公有探事兵十七人道出梁
達寨寨民疑爲賊也執之送官中途聞賊警恐被

劫遂殺之勒公大怒曰兵爲民殺賊民乃敢殺兵
窮治之獲十四人將實其罪行誅公言於勒公曰
民乃疑賊而殺兵罪固重然係誤殺也今以此駢
誅十四人不近於專僂乎請先僂主謀者二人餘
論斬請

旨然後行勒公從之

仁廟果以疑賊而殺與故殺者有間十二人皆免死

大兵凱旋有難婦數千無所歸衆議欲分給兵丁公
力持不可徧詢原籍有父母兄弟及夫若子者檄
各州縣盡令來省相認識以歸之咸感泣膜拜而

去公在雲陽道中舟敗幾溺大江中遇他舟救免
又嘗在川北老山墜馬傷力疾隨營先後奉

旨加道銜

賞戴花翎蓋公之盡心兵事久蒙

睿鑒矣公之治重慶也寬而明敏而斷循績美政有不勝
書者乙丑膺計典入

覲尋擢漳商道值歲洊饑晉中荒歉尤劇米石值白金十
七兩或請禁陝米出關公曰晉人亦

朝廷赤子吾不能爲陝遏糴坐令晉人飢餒縱之晉
省得食而關中人亦獲厚利在任四月擢山東按

察使瀕行辭方葆巖中丞中丞訪以治陝何者爲
亟對曰往者長制府以州縣采買倉穀累民奏請
永禁然所謂累民者不過年豐有穀之家不得善
價耳其患猶淺今禁之則倉廩空虛遇儉歲及軍
需倉無儲州縣何以應命中丞以爲然是秋請弛
前禁報可公赴熱河

行在謝

恩請

訓適寧陝中新兵滋事及

召見三次言必及軍務公多所陳奏事咸皆一一如公言

抵山東臬使任兩攝藩篆以夏旱運河糧艘淺阻
議雇民船駁運費大且擾請於中丞長公檄二郡
丞按籍疏通四百餘泉河水驟長五尺漕運以通
無何而公緣事被劾部議革職

仁宗念川省軍營勞績

賞給編修

國史館行走而公因從軍時受山巒瘴溼之氣得輭
腳疾至是復作遂引疾乞歸公仕宦二十年歸鄉
時無田可耕時長子同福以知縣需次浙江公遂
就養焉浙中當事知公至延主紫陽書院辛未勒

公開府兩江招公佐幕又主金陵尊經講席復入
揚州書局校勘全唐文及丙子歲歸主蘇州紫陽
講席於修蘇州府志里居又二十二年公閱覽遠
識所爲文貫串古今尤長於經世之學詩則破除
唐宋門戶風發泉涌援筆立成譔述甚富所刊獨
學廬詩文彙若干卷爲海內所稱書院肄業士二
十年來多得公陶淑成就公和易近人不立匡岸
而持論正大侍其坐者能使人鄙吝都消卽所居
建凌波閣貯書四萬餘卷集里中耆舊結問梅詩
社凡鄉中有善舉公必出爲頤袖始終無倦公以

乾隆丙子閏九月生至道光壬辰年七十有七又
逢九月置閏親串故舊及書院諸生舉觴介壽公
賦詩紀事和者甚衆癸巳重遊泮宮一時士大夫
皆有詩歌樂章紀之道光十七年五月五日無疾
卒於經史巷里第年八十有二公娶同邑贈文林
郎蔣惠賢公女

誥贈淑人先公卒子四長同福浙江台州府同知次嘉
祿殤次介福安徽按察使照磨出嗣公弟後次延
禧候選鹽大使早卒女八孫六峻華道光壬辰舉
人次瑞萃次嚴英元和學庠生次祀義次汝霖次

崐芝孫女八曾孫七守彝守訓守和守中守清守
樸守經曾孫女一將以是年十月葬公於西磧山
祖塋之西長子同福奉公行狀來乞爲銘當公視
學湖南時澍受知於公及撫吳公方主紫陽講席
得時時相見有地方興利剔弊事輒就公諮訪今
歸道山不勝山頽木壞之感銘曰

公持文枋惟閩與楚旣采南琛亦攬湘杜公奮武
功惟渝及蜀手書露布躬冒矢鏃觀風潼關陳臬
山左用將大展而乃小挫角巾扁舟五湖夷猶爲
鄉祭酒又三十秋榮枯兩忘夷險一致味道餐風

以樂其志西磧之西有芙蓉城山花礪水幽宅環
馨

封朝議大夫汪君墓誌銘

君諱景福字介夫姓汪氏先世居祁門貿遷盱眙遂家焉自高祖文學公以下皆績學稱善人父匯歲貢生

馳贈奉政大夫妣胡氏

馳贈太宜人君少穎異體羸鮮兄弟故父母特鍾愛之十二歲始隨父就館於天長茹苦力學年二十二以縣試第一入邑庠歲科試輒高等文譽噪一時旋食餼屢與鄉舉薦弗售藉教授以行其志所成就甚多課子尤有法長君云任以進士起家爲郡

守所至有聲君之教也其餘在成均庠序一一能
讀書守家法君幼齡順色菽水承歡居喪哀毀盡
禮家祭日雖蔬菜必誠必潔屏息拱立儼乎若思
燕居無惰容食無兼味授徒時常製一繭綢絮被
三十餘年不易至冬必覆有詩曰相親在貧賤同
夢幾春秋其儉約不忘舊如此而能推以澤物興
廢舉墜取義若嗜慾嘗以祖遺析定田產與同祖
兄弟更析之取少讓多俾得以自給族中無嗣者
爲之立繼無依者爲之教養成人津津無倦色邑
學宮圯君命云任割廉俸獨修崇聖殿每日赴工

次鳩比鄉人感其意以次任修各殿廡煥然成巨
觀徽有館在盱年久失修君獨任正室亦獲歲嘗
謂云任兄弟曰生財以義用財亦以義吾性儉於
義當爲無憾也况廉俸榮

君之照豈可據以自私哉君生於乾隆二十六年十月
初十日卒於道光十四年二月十八日壽七十有
四以子云任官三水縣知縣

敕封文林郎官番禺縣知縣加四級

誥封奉政大夫官歸順州知州加二級

晉封朝議大夫配王恭人泗州名諸生諱敬傳女性柔

淑年二十三歸君孝事舅姑得歡心每侍疾潔饌視湯藥惟謹以鍼膏佐君夜讀遇嚴寒指冷欲僵不少息居舅之喪哀慟盡禮舅甫殯而恭人病不能起矣恭人生於乾隆二十五年九月十五日卒於嘉慶二年九月十八日年二十九

敕贈孺人

誥贈宜人

晉贈恭人繼周恭人丈夫子三長云任嘉慶丁卯科舉人丁丑科進士歷官廣東三水縣知縣番禺縣知縣廣西歸順州知州江西贛州府知府娶吳氏次

云侄邑庠生娶柳氏次云倬附監生候選府經歷
娶黃氏女子子一適儒童程圻守節待

旌孫八人根敬廩貢生河南候補知縣根恕廩膳生云
任出根書根禮云倬出根芝根蘭云侄出根荷根
梓云任出孫女五人曾孫三人豫生印生房生道
光十四年十二月十八日葬於盱眙南山之雙桂
陂君所自擇兆也恭人祠焉云任來請銘辭不可
因爲之銘曰

先其難後其獲而康而色曰攸好德仁義之人藹
如也惟君時克

戶科掌印給事中蔣公墓誌銘

公諱雲寬字收叔蜀漢永相琬之後五代時徙家
永明之興化鄉曾祖縈旋祖向榮皆縣學生考元
縉乾隆辛酉拔貢歷官江南常州府督糧水利通
判直隸保定府鹽捕水利通判所莅有惠政曾祖
祖通判貴贈如其官祖及考贈如公官妣蒲氏生
妣盧氏皆贈太恭人兄弟三人長雲安增貢生胞
封庶吉士次雲容辛酉拔貢官光化知縣公其季
也幼穎異出語驚其座人年十八爲縣學生屢試
高等己酉選拔貢生學使昆明錢南園先生特器

之

朝考初列一等覆試以違式置後激而愈奮遂舉戊
午鄉試己未聯捷成進士入翰林散館改刑部故
事初入刑部以駁案之多寡敘勞績銳進之士伺
間抵隙相詰難一字出入輕重或失倫公不求異
譽察必以情嘗有蒙古母女殺婿獄公以爲罔同
寮言于曷從知之曰情不類也獄詞言女夫飲博
廢業女以訴於其母母勸之不悛乃與女謀殺婿
以三十緡賄婿之族弟操刃焉會婿與女同至母
家女返而婿不知所適踰月婿之叔獲其尸因以

殺壻成獄夫人莫親於夫莫愛於壻未有因飲博
小故遽謀置之死且操刃何事豈可賄不相習之
人爲之而尸又以踰月得死無日殺之人無見故
曰情不類也卽以所疑自司寇上之

詔覆鞠果不實如公言在刑部十六年所平反多類是擢
山西道監察御史條議吏部程限及緝捕會匪事
宜皆得

旨施行尤疾河工積習謂河臣歲用帑金鉅萬以治河衛
民生而工不以實竹槌石甾之屬或苦窳外實中
空每易潰決工所玩好充物倡優百戲畢具大汛

一過幸而無患卽議敘隨之間有身未赴工而名登薦牘者殊無以責實效杜倖恩也歲己卯河決豫州馬營壩乃條上河防四事一曰工官不常駐工僅於大汛時搶護宜嚴官守以重巡防二曰兵丁非實額每有危險雇民夫充役無事則徒手坐食不習勞苦宜足兵額以勤操作三曰各工分段非其所司多膜視不相策應宜懲推卸以期協濟四曰修隄取土例應在十五丈以外今或取諸隄下上培而下削禦險爲難宜申例禁以固隄根疏

入

款河臣行之既又言馬營壩開於引河疏濬不深黃流遲
緩致南岸漫口倘灌入洪湖不但高堰可虞卽淮
揚兩郡受害非淺宜及時籌辦

今上初卽位又疏陳河工善後事宜

詔軍機大臣暨工部會奏悉如公議蓋公之於河前後
章四上實有以見夫事之至大且急無過是者故
不惜慮之詳而言之數使目睹爾日南河之事其
慷慨發憤又當何如耶公性質直見義必爲事兩
兄極恭人有善稱之不去口有急振之如恐後癸
酉典江西鄉試所拔多名士旋擢戶科給事中轉

掌印益思有所建樹佐

天子明目達聰之治未竟其用以道光二年四月卒於
官年五十有八疾作猶上疏言時事嗚呼可謂能
盡其職者矣子四人啟鏐道光乙酉拔貢啟鏐啟
銜啟鉞女子五人婚嫁皆宦族將葬啟鏐來乞銘
余以職事牽未就而啟鏐卒又逾年乃獲踐諾成
此不勝宿草之感云銘曰

濯錦之溪其流孔長蔣氏宅焉歷久而昌芝茁於
學花韞於堂吉氣所應公專其祥言爲世用克練
以臧計周思遠中孚員方允矣君子蔚然時望我

銘章之匪私其鄉後有述者視此刻藏

山西平陽府知府韓君墓誌銘

今天子卽位之元年

詔下各省大吏遴其屬之賢者能者時瓜爾佳公成格
巡撫山西而某爲按察使公以澤州丞韓君應
詔晉之僚佐上下皆以爲允也奏上得

旨除平陽府知府平陽之人士相慶皆以爲賢也未幾
君卒遠近聞之咨嗟而太息皆以爲不竟其用也
君在山西二十餘載由襄陵縣調臨汾再調浮山
擢澤州府同知前後歷攝十餘郡邑所至有聲其
在襄陵甫到任值歲薦饑爲粥賑向設廠城中君

日如是則饑民之遠者有奔走之勞有守候之苦
適以資胥吏爲姦而聚五方之人於一區其氣將
蒸爲疫癘且男女雜處易啟不肖之心所慮有甚
於餓死者乃倣魏叔子救荒策每鄉各設一廠民
稱便官賑不足捐俸繼之並請下其法於他縣全
活無算又爲隄東門外以捍汾流民德之呼爲韓
公隄其在遼州遼僻處太行文教不章君至爲建
書院籌廩餼進庠序之髦勗以植行績學擇其尤
而弊厲之遼士不與於賓興之籍者垂三十年至
是乃復聞工歌鹿鳴焉他所莅善政皆此類不盡

述述其卓卓大者君尤長聽訟所平反榆次白氏
及平定州侯氏諸大獄奉

旨議敘然不以自喜曰聖人貴無訟明察不足尙也每
有審讞必推勘再四然後定曰一字之間可生殺
人奈何弗慎性至儉無輿馬之飾食不貳味某爲
按察時君所寓稍遠遇有公事乘敝車棲遲而至
者市人見之不問知其爲韓君也君在晉久所居
民樂所去民思平定州卸事時百姓各持水一盃
鏡一具送之至百里外又嘗署大同府旣去任一
歲民有聞君貧齎千金至省餽者曰感公德政無

以報曩在郡未敢獻以避嫌也君卻之再三終委而去嗚呼此誠三晉民俗之厚然非君實有深入於民能作而致其情與今

天子勤求吏治尤重二千石之選其由密舉拔擢者不數年或仕至開府而君抵平陽竟不及有所設施而卒命也夫君諱輝字虛舟世爲浙江會稽人乾隆己酉科舉人嘉慶辛酉大挑揀發山西道光元年七月補平陽府八月三十日卒於任距其生乾隆丙子某月日年六十有六祖吉占父貞麒皆以君貴贈如其官夫人婁氏先君卒子四人長繹四

川候補鹽大使次振縣學生次某某俱幼女子六
人長適胡某順天舉人次適婁某江西南安府經
厯次適孟某浙江舉人卽選知縣次適李某次適
賀長齡現任江蘇布政使次字楊某以某年某月
卜葬君於某原君之葬也次君振以狀乞銘於余
未及執筆而振沒至是悲宿草矣夙諾不可負乃
撥冗而爲之銘銘曰

維晉有陶唐之遺風而君一生與爲終始尸之視
之惠孚遠邇遠邇既孚達於

天子僉曰異哉而竟止於此

山西蒲州府同知陳君墓誌銘

歲辛酉余方留京邸其年各省舉鄉試闈墨至都
下盛傳以湖南第一名爲最且聞其人敦古誼肫
肫孝友人也於時海內操觚家莫不知有解元陳
君者君諱世昌字卜五號藝蓀先世由荊州遷武
陵曾祖祖父某母某氏皆贈如例君生二歲而孤
與一弟兩妹俱育於叔祖母胡氏稍長受業同里
王春野先生之門好學異於衆年十四補弟子員
旋食儼歲科試輒冠軍嘉慶五年選拔試諸生臨
點呼君名不至督學吳稷堂先生坐以俟使學官

促之再四辭以叔祖母疾篤督學歎曰此之謂優
明年考取優貢第一卽於是科領鄉解比入都公
卿聞其名爭延請課子弟經其指授多取科第如
摘髭十年考授國子監學正十七年推陞博士補
儲濟倉監督二十五年選授山西蒲州府同知時
瓜爾佳公成格爲巡撫與道府諸人皆雅重君知
其廉明肯任事委以積案之疑難者不兩月審結
七百餘起塵牘爲之一空復捐廉俸創書院以育
士調署監掣兩次委修城工費省而工堅屹然有
金墉之望焉當君官國子監時文名在天下僉謂

宜取上第一時鉅公卿主會試皆欲得君爲榜目
重而君卷故虎氣騰上無次不薦或已入高選僥
得復失比榜發則相顧忤愕往往失君者卽平日
謂欲得君者也文章憎命達信矣夫其在晉省官
聲尤著百姓服而懷之甚至鄰蒲境如陝豫之民
有事亦投狀於蒲欲得陳公一質訊卻之不得以
好語慰遣之再三猶徘徊不肯去其得民心如此
會歲旱永樂鎮尤嘆君步行禱雨遘疾卒臨卒前
手編所著親雅堂詩文若干卷復致書其姑丈唐
竹谷以徵選湖南詩文爲言且寄以刻贊若自知

其將不起云君生於乾隆四十二年八月二十日
卒於道光三年十二月初十日年四十有八歸葬
本邑西關外烏龍港配戴宜人子二長慶基娶廩
生蕭某女次慧基聘庶吉士羅瑛女女二適某某
孫某幼銘曰

鼎之山嵎嵎沅之水舒舒代產名宦鍾名儒吁嗟
藝蓀兮其用未竟而志不踰此山此水常厥居

趙琴士徵君墓誌銘

國家選舉之法因明代舊制常科外又有博學宏詞科有孝廉方正科以待异才魁彥士而孝廉方正之名尤美非文行相副不足以當之自

睿皇帝至

今上凡再舉皆於臨御之初用風示天下當道光元年余藩安徽咨於衆以琴士趙君首應

詔君固嘗辭府縣辟不就迨余採芻議特檄舉君涇令復親詣敦促始就道然年已七十不欲北上無錫孫文靖公時爲撫院乃以第一名咨部給六品冠

帶會有

旨俞余請修安徽省志遂以纂輯事任君凡在局五年
志成同事歎其熟於史事條舉件繫詳贍有體云
旋主講池州府之秀山太平府之翠螺兩書院殷
勤教誘不稍倦道光十三年七月十二日卒於里
距其生乾隆十七年正月初三日春秋八十有二
君少好學九歲卽以能文稱伯祖侍御諱青藜公
極喜之年二十應童子試以經解冠八邑受知於
大興朱笥河先生拔入縣學旋補廩膳生朱先生
奇其材手授以許氏說文且言讀注疏日毋過十

頁讀說文日毋過十字必精造乃已一時學侶咸
推之屢薦棘闈不售遂棄去八比藝專力於經史
百家及碑版書畫之屬罔不鉤考決擇惟精其所
著書有新舊唐書互證二十卷通鑑注商十八卷
建元考二卷校補竹書紀年二卷校補王氏詩考
二卷金石文鈔八卷續鈔二卷金石跋六卷涇川
金石記一卷涇事一卷讀晉偶記八卷消暑錄一
卷古墨齋筆記六卷古墨齋觀書記八卷古墨齋
書畫記一卷琴士詩鈔十卷文鈔六卷又輯其生
平師友詩爲蘭言集十二卷文爲同心言一卷輯

其族人詩爲趙氏淵源集十卷又彙集涇先輩所著書數十種爲涇川叢書百餘卷皆行於世在志局日又另輯安徽人物志八卷安徽金石錄八卷待刊君性孝友處鄉里恂恂然終身樸學手一編窮日夜不輟當事重其爲人皆禮敬君曾未一私謁兩署滁州訓導一署廣德州訓導皆不數月而士林慕之依依不能舍其教人先行誼而後文藝其於邑公事有可以持風化蘇民命者未嘗不身爲之倡也以故遠近識與不識咸謂行誼如君洵能不媿所舉云在嘉慶時是舉所得有吾鄉嚴公

如燧安徽程先生瑤田嚴公

廷對策略伯仲賈生其後著績漢南爲一時名臣而
瑤田篤學爲諸生祭酒雖不出其志行均也若君
者其瑤田之偶歟君諱紹祖字繩伯號琴士其先
出宋之宗裔曰不吝者由河南來遷世爲涇之東
隅人曾祖崇濟祖際飛考良猷皆以文學列名庠
序配倪氏有淑德與君同歲生後君一月卒子國
楨孫同璋俱縣學生曾孫二鵬飛蛟起元孫三如
錐如鏐如鏜君逮事王父下見元孫道光七年以
七葉衍祥

欽賜扁額加賞緞正十一年以修城勞

欽加五品銜其卒也涇人士呈請祀於其鄉將以某月

日葬某山國楨前卒同璋主後來請銘銘曰

吾聞之三代以下習俗莫美於漢京自科舉帖括
起而士多遺實而趨名惟我

國家執權持衡旣舉大比以鵠羣英復有特科以廣
子旌有皤其叟研古敦行于涇之原拓書滿楹恒
窮年以矻矻惟心耘而日耕炯靈光其上燭感藜
火而下視乎星精猗彼何人其通德之鄭氏歟抑
傳經之伏生

安徽無爲州學正

諡封中憲大夫例晉通議大夫河南按察使司按察使

張君墓誌銘

松婁爲人文淵藪而張氏自大司寇文敏公以書
法名天下稱

本朝第一公之從孫學正君紹其學與其子廉訪君
尤以詩名余未識學正君而與廉訪習每喜就余
言詩有以知析薪之教所自來也今年秋學正君
歸道山廉訪來乞銘納諸壙余曷敢辭按狀君諱
興墉字金冶別字遠春晚號延庚先世自上海遷

於婁遂家焉代有詩書曾祖淇置義田贍族雍正
間

特恩追授吏部左侍郎崇祀鄉賢建祠橫雲山莊春秋由
官致祭以文敏公貴

誥晉光祿大夫刑部尙書妣陸氏生妣錢氏皆

誥贈一品夫人祖維煦封儒林郎翰林院編修妣王氏生

妣徐氏皆封安人考遜亭公諱夢喈例授儒林郎

累贈至中憲大夫例晉通議大夫妣姚氏生妣汪

氏皆贈恭人例晉淑人君幼而奇慧與其兄悔堂

並負神童目遜亭公故能詩而汪太恭人亦著有

貽孫閣詩草故君兄弟秉庭闈教以詩名最早旋
補博士弟子員食廩餼舉優行試輒冠其偶登乾
隆己酉拔萃科庚戌

高廟東巡狩獻賦

行在列高等

賜緞正入京師試成均第一嘉慶辛酉始舉於鄉而君年
已四十矣丁丑大挑二等選太倉州學正大府多
其能造士檄調安徽無爲州學正保薦引

見以知縣用時廉訪已由戶曹入直

樞禁君遂就養京邸是年戊子廉訪奉

命典試闕中瀕行君誠以校士宜加慎勿負寒峻望是
科闕榜稱得士多聯雋而丙申

廷對一甲第一人第二人皆是科所拔君聞益喜而
賦詩蓋君之能勗其子與廉訪之能承其訓如此
君家舊有塔射園擅裙屐之勝自北還復闢詩境
一楹作詩寄都門和者甚衆自署五茸歸叟志不
復出也君書淵源文敏公而又參以米董故遒勁
多藏鋒詩法玉溪遺山詞則規模南宋諸家其他
作大都以清麗典雅爲宗著紅椒山館集若干卷
王述菴司寇序其初集云望之炳若列繡聽之淒

若繁絃時以爲知言喜游覽嘗登泰岱涉嵩洛探
禹穴修禊蘭亭皆繪圖紀勝所交盡海內名宿復
樂育後進篤於兄弟敦戚誼人尤以是稱之君生
於乾隆二十七年三月二十一日卒於道光十七
年七月二十八日年七十有六生前兩遇

覃恩誥封朝議大夫晉封中憲大夫例晉通議大夫河
南按察使配王淑人同邑候選州同

贈封奉直大夫內閣中書王公鎬女

誥封恭人例晉淑人側室吳氏子五長祥河嘉慶庚辰
進士河南按察使次公權庠生

聖廟齋奏官兼司樂次公理增廣生次祥琛候選從九品出嗣君弟次公復卽選從九品女二均王淑人出孫五長昌緒早卒次茂繹

聖廟奎文閣典籍次茂綏次茂慶均業儒次茂羣幼孫女六卜以卒之年十二月某日葬於某山之原銘曰

童而神強而仕醉六經液四始昌其文復有子將
槃其根而益沃其柢以燦其華以爲其祖禰於戲
孰謂君已矣

內閣中書李君墓誌銘

嘉慶癸酉正月十二日白橋李君以疾卒於京邸
同年生陶澍與其友官於京朝者相率經紀其喪
南歸已復念君齋志沒不可無述也輒次君行實
以寄其孤俾碣而納之於壙君諱在青字貫時白
橋其號一號柏喬同郡湘潭人也先世故衡陽徙
其後乃定居長沙云曾祖吉候選縣丞祖榮傑太
學生父宗瑚早逝母陳太安人守節撫君至於成
立太安人素嚴明篝燈教讀未嘗以一子假借作
止必依法度稍長文譽大起旋入學爲博士弟子

員試輒冠其曹岳麓山長羅慎齋鴻臚尤愛重之
每言李生一日千里施之大廈棟梁材也是時大
湖以南莫不噪白橋名咸謂功名可摘髭取而君
鄉試顧屢黜及戊午以優行貢成均同貢者彭寶
臣浚也明年禮部會考天下優生君第一庚申與
寶臣同舉北闈君卷出靈石何水部元烺之門冠
其一房其後寶臣占大魁而君僅以鑲紅旗教習
期滿出爲教諭於沅陵辛未復赴會試雲夢楊員
外世英得君卷以呈大總裁富陽董相國誥歙縣
曹大司農振鏞通州胡少司馬長齡滿洲閣學文

幹皆驚歎爲名作榜發復冠其一房始君之捷北
闈也閣學與長沙劉相國權之滿洲侍郎英和爲
主考官咸於君有國士之目至是尤相慶得人長
安諸鉅公爭欲識君君閉門謝客惟日書試卷數
千字曰盡其在我而已藥籠中物非所樂也
殿試名在十卷不列鼎甲傳臚先日赴

乾清宮引

見出遇讀卷諸公新城陳侍郎希曾就執君手曰是李
君耶策對書法一時無兩向固疑爲君矣慰藉久
之長沙相國亦太息焉旣而館選不得預蒙

恩以中書用君自揣精力尙壯欲改官一邑以自効史
館諸先生以君學問精博留君校理秘文會蒙古
王公大臣表傳成遂以委君行且用優敘注選而
君竟不起矣君爲人清矯拔俗規外而矩中議論
丰采奕奕然貌癯削如巖松礪石爲文清勁刻露
迴絕時流書法入趙吳興室生而孤苦晚始一第
又不如其志他人或爲之不平而君泊如也病革
時澍與劉比部教五楊孝廉世煥唐太史鑑賀太
史長齡立牀簀間問遺言惟云人生不免此一日
良久復曰莫非命也遂卒蓋臨終不亂如此君生

於乾隆甲申正月初一享年五十配廖氏生子立
恒側室謝氏生一女尙幼君官沅陵時嘗力舉苦
節三人辛未春有夢迎節孝扁額自君所者其數
適三其年遂登第及官內閣以母氏節行呈部請
旌

命下君已沒竟不及知是尤可哀也已銘曰

經以德緯以辭材其身而無施嗚呼斯人也而止
於斯

判翰林院庶吉士蔣先生墓誌銘

永明有篤行君子曰泰垣蔣先生偕其難弟敬亭
錦橋產各異母而友于特摯歲辛酉其家所植山
茶有一苞三萼之異與其昆弟數適當里中僉謂
友愛所致請於邑令龔君爲名其堂曰瑞萼而作
詩以聲之於是士大夫始嘖嘖知所謂泰垣先生
者先生諱雲安字慕嶠曾祖曰縈旋祖曰向榮邑
庠生俱以先生父貴

敕贈承德郎父諱元縉拔貢生歷任常州保定等府通
判自先生曾祖以來世有隱德而通判公轉漕江

南有惠政去官時旂丁感泣人謂蔣氏之後必昌
迨先生兄弟競爽敬亭錦橋皆以科名起家官中
外有聲惟先生終老諸生未竟其志然成兩弟之
名者先生力也平生篤倫誼生母張氏早卒鞠於
庶母劉氏劉沒先生呈請持慈母服格於例不果
然猶心喪三年人以爲難錦橋官京師其生母卒
於籍附身附棺皆躬之又爲之經營窀穸偕錦橋
捫崖歷澗谷蒙霜雪犯霧雨至手足胼胝不少卹
錦橋嘗病先生守牀側煮藥糜時酷暑畏風卽却
扇不持爐火炸蕘汗淋漓交於頤睫家人請代其

勞弗許也。兩弟連歲北上春糧，戒行必豫，下至襪囊瑣屑之屬，悉手自檢點，爲小摺以記行者擔簠。就道若無事焉。兄弟同居數十年，初不異財，衣履器具彼此與其妻孥化之，門以內無詬厲聲。蓋其教使然。敬亭知光化迎先生至署，不數日卽去。司閹黠者數人，而風紀大肅。又以刑曹爲人命所繫，每馳書訓錦橋，有云：「小大之獄，期於得情，稍有不當，雖杖笞微罪，亦干天譴，切勿存意見貽殃。」子孫其精明仁恕如此。邑令聞其賢，或諮以民間利害，知無不言。先是邑有牛戶，供春秋祀，太牢胥隸。

因緣爲利戶不勝擾先生言諸令改由官給值邑人稱便牟巖山腹有若敖之餒數棺怠葬近百年力舉而瘞之又嘗葺書院義塾修宗譜釐祭田救困濟急無虛歲而心力亦遂瘁矣癸酉之秋錦橋奉

命典江西鄉試揭曉後先生來視於行館握手尋風雨約甚懽是時先生年未及耆顧頭童齒豁頽然如耄耄錦橋回京言及以爲戚余方慰藉之不兩載而先生竟卒嘉慶二十年某月日也距生於乾隆二十四年得年五十有七配蒲氏生子「一早殤今

有子三人皆側室某氏出先生由增廣生援例貢
入太學其加儒林郎翰林院庶吉士用錦橋所居
官

地封也某年月日葬於某山之陽銘曰

棣之華兮姬室以隆荆之務兮田氏以窮耕道於
意兮種福於躬雖畝之異兮厥穎其同墓門有壘
兮松柏蔥蔥時流德音兮先生之風

傅明經墓誌銘

先生姓傅氏諱克綏字恒性家澧之墨家洲遂自
號墨洲先世故豐城徙曰卿之者其高祖也曰子
林者其曾祖也祖曰睿翁有隱德嘗操舟津市遇
一丐膿血被踵求渡翁惻然載之中流忽耳語翁
曰翁長者勿洩吾知翁家方析箸艱食吾與翁米
因撤少許置釜中有頃浮浮然十數人食矣遂傾
囊授翁負以歸而丐亦不復見其後家日裕故人
稱傅氏曾遇仙云父曰世禮母嚴氏有同德勤於
治生敦善行不怠貧乏者多賴以存舉丈夫子五

先生其次也爲人皙貌豐身須髮纖長望之飄飄然少志於學屢困場屋久之乃入成均爲明經已復游京師燕得一官以自試然亦竟無所遇遂歸延明宿課子姪書寒暑風雨無間善飲酒日盡無筭爵酣後閱詩文至得意處則豪吟朗誦不自覺其舞蹈也其臨事毅然州城西隅故有范文正公讀書遺址乾隆辛亥當道議建書院其側廉知先生有幹濟才畀以綜理任鳩費程工辛劬不避不四年而堂基門廳廚舍之制煥然復置田若干畝其人以爲膏火費規畫精詳皆可垂之永久巡道

臧公州牧方君極嘉嘆焉丁巳復住書院一載手
纂院志逾歲而先生卒矣先生生於某年月日年
五十以是年十一月初一葬於北隅里之孔家礪
配謝氏子男三人宗杰例貢生受業吾門爲儒士
娶庠生丁某女次宗焯娶貢生庾某女次宗燦女
子二人長適國學生田某次適庠生嚴某孫男一
人宗杰出銘曰

德其世也才其身也華國之英而草澤之沈淪也
厚積者光吾以券其後之人也

薛上舍墓誌銘

上舍位一薛君以嘉慶元年二月十八日卒於寢
距其生乾隆十六年十月二十一日享年五十有
四其子登芝將以某月日葬君於澧州之黃崇山
乞書其墓道之石蓋余不及見君而登芝侍吾門
有年有以知其析薪之教則不辭而問所以書之
者始君之祖曰希洪武中由吉水徙澧州之黑沙
灣祖諱琳州學生父諱遂附貢生前母氏楊母氏
向兄弟三人君其季少志於學有才氣一再試弗
售遂棄去闖處山林灑然自得其於世故無所營

惟好讀書每覽史策至忠孝節義事輒若置身其間而不能自己爲書室延師以訓子姪舍者避席煬者避竈晨昏詣問懇懇然里中來學者月必有筆墨之費以資激賞事父母先意承志一飲食必親待兩兄如父疾痛搔癢問衣煥寒逮白首無間言親舊貧乏者求之立應尤謹於祠墓爲置祭田若干所條舉規訓具有法度當道議建書院以待學者而難其襄理之人君遂與同志諸人銳意任之當道嘉其勞將欲爲其子地君聞之謝不厝也處鄉里務爲雍異其田園有與人毗者因其爭舉

而讓之其人往往自慙出不再爲患臨沒猶呼其
子語以謙退接人精勤律已云蓋君之行事不止
於此登芝欲述之而有難於言者則余亦無從而
述之也噫此其所以爲隱德也夫君之諱曰名卿
位一其字也配楊氏有淑德子五人登芝州學生
餘皆業儒孫五人君旣厚積於躬而其子皆駿發
而焯所以食其報者當在是也銘曰
溫然以澤與若而韜黃崇之原有墳其高嗚呼先
生宅於此以昌其孫子

封奉直大夫孫君墓誌銘

由井陘入晉道平定州所謂太行第五陁也其山川磅礴蜿蜒科目甲於晉省曩讀少冢宰新城陳公希曾所爲冠山書院記知有孫君敏齋者實新之以居學者文風由此益起其子植忠舉鄉試出余鄉石黼廷太史之門今夏孫君沒植忠要經款門乞銘其墓按狀君諱某字某由太學生援例授州同加二級

誥封奉直大夫其先諱溫者明時以選拔貢生充代王府教授凡數傳至儒林郎某君之祖也父諱某候

選主簿君幼有至性父病目禱於神祈以身代目
旋愈屢試弗售乃用計然術趨時上下獲利數倍
顧獨留意經術架上插籤常滿於史鑑尤邃下逮
扁鵲青烏家言皆能通曉遇文士盡禮敬質疑問
難津津然以故其鄉先達多與之游母曰好施子
君每贏已澤物以承母志姊沒撫其孤如子從姊
妹及族戚婦者多貧乏不能自存君贍之終其身
且經紀其家婚喪皆賴焉有從叔客奉天音問久
絕君走數千里挈其父子同歸其他置祭田修義
學通津梁給棺槨以瘞窮者周困濟急殆無虛日

嘗謂植忠曰吾非好施子特義不容辭耳嗚呼世俗暴富兒窮嗜欲耽玩好游嬉徵逐揮千金如土直至義所當爲往往吝及銖鎰不顧而唾其有生前生命死後孤嫠時勢旣殊炎涼頓易如劉孝標所遇葛巾練帔之狀蓋已交不勝絕矣觀君之好行其德如此而又有賢子爲之發抒其嫵以視夫寶贏金而薄一經者相去豈可道里計耶君生於乾隆某年沒於嘉慶某年將以某月日葬某山配某氏子植忠庚午舉人婚嫁皆世族銘曰

五而六之九而十之匪以術購也風而風之雨而

雨之匪以義售也世之永也稱其冑也我辭可徵
金石壽也蓋猶枕挹乎太行五陁之秀也

趙母李太恭人墓誌銘

嘉慶十九年江南大饑吾師給諫趙公方自四川
學政奉內諱歸丹徒亟捐金倡勸躬司賑局得二
十餘萬金以大活鄉國之人又糾二萬餘金爲卹
養會以養嫠婦之守節而貧者蓋師自痛少孤母
嚴太恭人苦節教養成立而不獲大享其報每與
閩中友李恭人述及先世未嘗不中夜感悼至於
流淚故竭力商舉是會徧推惠邑中寡母孤子以
報飭勞於罔極蓋師之孝思所極而吾師母李恭
人之善相夫子以成其志爲尤難能也憶自庚申

鄉試受知門下入都數載見吾師清苦一門內外
闔寂至四時賓祭則不俟一言而中饋衍衍臧獲
秩秩故吾師得一意公事巡視漕運稽查銀庫數
厯中外數十年名在四方絕不爲內顧憂其相師
於生前者如此師官京師宗黨待舉火者十餘家
自丙子捐館家無祿入恭人撙節資助如故不忍
一歲廢而都門各善局養老病施棉粥義學惜字
戒殺放生除夕散錢伏暑施藥視師在日有充於
舊而年例給煤米之期則窮民道遠後至者雖逾
期亦補給焉師晚議建宗祠未就而沒太恭人命

志彤歸籍經營成之臨終遺命猶以增置祭田若干畝爲諄諄其成師未竟之志於身後者如此至若侍姑在家則典珥營膳以婦代子棄養歲薦則躬親錡釜食性必諳始知采蘋大夫之妻北門詩人之室關王政之通塞焉非僅仕宦之瘁逸而已自師沒八年道光癸未正月而恭人卒距生乾隆二十五年庚辰季冬享壽七十以給諫公官

誥封恭人以珥彤官晉

封太恭人子二長志彤撫仲兄之次子也道光壬午科順天鄉試舉人選貴州鎮寧州知州未赴任卒次

珥彤兵部職方司郎中孫爾昌爾猷皆珥彤出爾
昌殤道光壬辰四月將合葬恭人於給諫公之塋
以某門下士知之宜詳使來請銘銘曰

師倡之母相之維德其配之師鍾之母終之世世
子孫其共之

彭母黃太宜人墓誌銘

道光紀元初戶部彭君永思以其父芳園翁母黃
宜人親見七代五世同堂由本部呈奏移咨禮部
請

旌得

旨賜金幣並七葉衍祥坊額翁賦詩紀事有云大哉
新聖主渥澤何其溥五緯日輝聯

九重龍飛舞我幸際太平含哺而腹鼓九十眉雙雙伯
鸞差步武蓋其時翁與黃宜人俱年近九齡里之
人莫不詫歎以爲此盛德之報翁之歸道山也以

陶文毅公全集

卷四十五

聖

癸未無疾而終又五年而黃宜人亦坐恒永思方
侍籍與其兄永日永齡年已六七十猶毀瘠爲孺
子哀稽顙致書乞銘母墓余辱與永思同舉又辱
爲兒女姻其曷敢辭按狀宜人善化望族爲

皇贈奉政大夫蟬一公女年十六歸於翁翁諱勝桂芳
園其號也居長沙淳化都俶儻有大志鄉試屢薦
弗售以其學刻勵教子孫宜人實贊之厚禮延師
潔羞饍奉酒漿必誠必信性勤儉衣裳必親御蔥
韭必親剪米鹽瑣屑皆躬之與芳園翁加賓數十
年白髮齊眉曾元繞膝含飴而樂之然禮法自持

一笑言無苟時舉先時艱難之迹以訓子孫永思
之始官於滇也翁爲文告祖曰如履薄冰戰戰如
臨深谷惶惶倘淪夙訓而琢喪元氣懼天公之眼
目昭彰回顧永思曰飲水者不忘泉爾其凜之又
曰士人束髮受書卽望做官爾今沐

皇恩授一官其操何道以從永思悚然翁徐出囊中一
小冊題曰仕途握珠永思跪受維謹未幾莅事果
政聲大振翁往視喜焉歸以語宜人稱其率教其
後永齡之子正臺以議敘縣佐分發福建永思之
子申甫以通判應選宜人皆舉此爲訓俾毋忘祖

澤云宜人生於乾隆三年某月日卒於道光八年
三月某日享壽九十用道光元年

覃恩誥封今稱子六人永日監生

貤封奉直大夫永年邑庠生永齡從九品職永疇監生
永思庚申舉人已巳進士知楚雄縣歷官嵩明州
入爲戶部貴州司兼山東司員外郎充

睿皇帝寶錄館校錄永亮早沒孫十八人永日出者四永
年出者五永齡出者六永疇出者二永思出者一
曾孫二十六人元孫三人嫁娶並士族將以某月
日葬於某山之陽某山某向銘曰

其生也壽其沒也康桐芭移鄂連崇岡佳城鬱鬱
茲焉允臧

章宜人墓誌銘

澧州牧會稽謝君有賢耦曰章宜人以道光六年
卒於官署踰期猶悼以狀來乞銘觀纓宜人行實
覽之使人悱惻宜人爲淮南運判某季女生而端
慧習禮明詩遠近聞之多欲委禽君幸而得當然
故寒素媒孽者日至已盟幾復渝而宜人矢死不
貳乃得踐初約歸於君有非尋常伉儷所能擬者
惟古者女子許嫁纓所以明有繫也女之繫夫猶
臣之繫國然深閨弱女其不能徑情直行又有難
焉者而卒能委曲維持以遂其志固宜君之長噫

累欷久而不能釋也狀又言宜人以未逮事舅姑
祭必齋時食必薦君冷汰不事生產宜人操內外
籌策井井靡遺俾免內顧憂君於仕有可爲速化
地宜人進以循步毋突梯及量移首劇則益相勗
敦撲滿戒雖旣貴女紅不輟手時紉敝舊衣兒女
以惜物力所舉子女各四姓然筭立猶勸置側以
廣似續雖不見聽而詞諄意切凡諸嬖德有一足
以賢而宜人兼之又重以不可奪之節雖微謝君
之深於情亦豈能無塊鞠之感哉宜人生於乾隆
某年月卒時年若干其葬在某山銘曰

女德莫如貞笄而字矣盟奚可更然未成爲婦縱
有渝也猶恕其女而責其母與兄豈知磐石不轉
卒無能奪其所行宜乎當之者有知己之感而非
徒戀戀乎兒女之情雖然谷風陰雨詩有變聲嗟
嗟謝君糟糠不忘聞諸宋宏

長女瑞姿墓誌銘

長女瑞姿適湘潭周氏幼而端淑神氣粹然子妻
黃夫人尤鍾愛之九歲隨子之官翰林太常卿周
石芳先生聞其賢爲其第三子詒樸求聘焉戊子
春子歸其日石芳先生擢吏部侍郎子亦論科俸
記名以道府用觀者榮之以爲女貴人也故所值之盛如
此逾年生子翼涑又逾年生子元官其時子方自
川東擢晉臬旋擢皖藩兩次入

觀均主石芳先生家先生不俟子坐定卽挈以視女蓋
先生夫婦視之不啻已出憐其念父母而急欲一

慰之也然女雖見父顧久不見母思之益甚又元
官殤哭之傷血遂病會石芳先生由工部侍郎視
學江西旋調戶部移江蘇學政女方自京師隨其
姑謝夫人由水路之江南抵皖署而予適奉安徽
巡撫之命女則喜病體爲稍愈居兩月偕壻歸爲
其舅姑六十壽無何病復作遂卒於江陰官舍其
舅姑哭之痛至於仆地不能起自妯娌以至奴婢
臧獲皆哀泣不止於廬此可以覩女德矣性儉約
雖處華閭猶布荆也尤愛惜物力一絲一縷必手
自檢點其孝思肫然已嫁而念父母比歸又念舅

姑輾轉弗能自割以至於病其可悼也已其生以
嘉慶五年庚申二月初五日亥時其沒以道光三
年十一月三十日戌時得年二十有四女沒之次
年石芳先生亦卒女柩隨之將歸葬於辰山壠周
氏之兆乃爲銘之以抒予悲因以昭示其後裔銘
曰

空潭瀉春古鏡照神穆乎其氣之清也落花無言
人淡如菊聞乎其度之貞也緱山之鶴華頂之雲
杳乎其乘月以返眞也蓋司空之品詩如此舉以
品吾女乃適如其人也於虛孰不有古南山我哉

宅於此俾爾後之人福蔭孔多